

欽定剿平三省邪匪方略

欽定剿平三省邪匪方略正編卷一百六

己未年

六月十六日

癸卯

勒保奏言查額勒登保一路官

兵剿辦張子聰冉添元等股賊匪由通江之小

羅壩截回五月十二二十五等日在空山壩鐵爐

壩兩處追上張子聰賊股殲擒一百餘名並七

八十名餘匪向老林竄逸十八日正由灰灘一

路追剿忽報後路有賊額勒登保卽派兵從望

月山向楊壩進發追至川桐子該匪正在過河  
維時馬隊先到鎗箭並發斃賊二百餘人撲河  
淹斃男婦二三百人我兵晒水趕至苟家坪沿  
途又殺賊一百二十餘名生擒李士英等五十  
七名訊悉冉添元從西鄉勾結齊王氏夥內剿  
散餘匪稱爲齊家營係宋永富爲首與冉添元  
同至四川欲與張子聰鮮大川合夥不料被官兵

剿殺冉添元尙在後面相隔數十里未經過河  
額勒登保以現在張子聰等已入簡池壩老山  
林內既有冉添元等在後自應就近剿除肅清  
運道當卽分兵由金子坪白巖坪兩路兜截二  
十一日於禾楚壩趕上冉添元一夥正在對面  
翻山額勒登保催兵冒雨進擊斃賊一百餘名  
生擒易文俊等二十三名時因大雨滂沱未得

窮追二十六日天色稍霽探得該匪等向鎮龍  
關一帶奔逸距王登廷所屯之竹峪關不遠額  
勒登保又分兵由喻家坪洪口兩路追躡臣復  
飛飭前派帶領雲貴新到官兵之副將褚大榮  
並德榜泰派留太平之總兵李紹祖等各帶兵  
勇卽由竹峪關將王登廷逼歸洪口一路與額  
勒登保三面環攻至德榜泰自五月初七日在

陝西泥坪將宋大志一股擊敗之後卽帶兵赴  
麻柳壩剿辦龍紹周唐大信等匪初九日進抵  
該處賊匪竟敢率衆抗拒我兵奮勇直前吉林  
協領穆騰額首先衝入賊隊射死騎馬賊目一  
名賊卽奔潰官兵乘勝追殺斃賊八十九名生  
擒楊廷佐等二十八名投出難民王士民等六  
十五名訊知射死賊目名李繩英卽係前此龍

紹周派赴滄水河劫營之人德楞泰連夜督兵  
追躡十一日巳刻兵至雙合塘正值該匪等欲  
向西土木壩奔竄路通紫陽官兵卽由右手順  
山搶佔西土木壩山梁自上壓下剿殺一百五  
六十名生擒周鮮民等五十七名賊衆卽由六  
道河折竄十四十五等日又于老虎溝界嶺兩  
處趕殺賊尾九十餘名生擒李文賢等三十一

名將前此竄陝之賊全數攔回川境訊據活賊  
供稱樊人傑張添倫先已竄回四川是以龍紹  
周亦卽折回官兵連日追剿二十日師次觀音  
祠忽聞前途火石寨老鸞寨一帶鎗礮之聲德  
楞泰卽催兵馳抵蒲家壩山梁遙望賊匪正在  
圍攻兩處民寨隨督率阿穆爾塔賽冲阿温春  
穆克登阿各帶馬步官兵分投抄截該匪等猝



不及防所有攻寨之賊卽紛紛退佔安寺坪山  
梁我兵鼓勇競上斃賊二百餘名餘衆潰散復  
經官兵追壓殲斃及滾巖落澗者又有五六百名  
生擒李朝吉等三百四十一名口賊目扈一全  
趙經武二名並張添倫之媳郭氏訊知張添倫  
自湖北竹谿打敗之後與樊人傑合夥同回四  
川正欲攻破火石老鷲兩寨屯紮迺夏不想官

兵到來殺死多人今張添倫不知逃往何處等語德楞泰探知該匪等均由關口壘先後竄至高頭壩羊耳壩一帶潛匿因連日大雨水漲不能進兵刻下天氣放晴正可卽時痛剿至朱射斗剿辦包正洪等匪連日在江北境內分投截擊至清水河追及賊衆該匪等始猶抵拒有建昌兵丁李廷剛將包正洪之弟包正德立砍下

馬餘衆奔潰追殺三十餘里斃賊三四百名內  
有賊目汪正拔一名並擒斬文宗相等四十七  
名投出難民二百五十一名餘匪卽向鄰水大  
竹一帶折竄三十日追至開縣所屬之九龍山  
下斃賊四百餘名生擒馬官成等九十七名賊  
匪勢甚窮蹙惟包正洪尙復稽誅臣已飛飭朱  
射斗盡力窮追務於日內辦完又卜三聘與平

利竄回之賊不時窺伺夔州欲圖東竄經七十五督率兵勇於寶塔蓮花池一帶分投堵剿亦有斬獲不致闖入楚境至此次川省各路打仗惟七十五一路守備朱映棠把總邢光周受傷陣亡其餘間有傷亡兵勇容俟查明咨部再查軍營統兵大員必須素有聲望與將士同心方能獨當一面明亮久經出師聲望尚重但持重

有餘勇往不足且又自恃老手不聽人言所剿  
張漢潮一股雖因兵力稍單而其辦理鬆懈亦  
所不免目下雖已添兵恐難望其卽時得手當  
此軍務喫緊之際臣亦何所顧忌第念其究係  
久厯戎行此外欲如明亮之尙有聲望者又難  
其人現在張漢潮一股在漢江以北必須先行  
剿滅以除陝省腹地之患應懇

皇上降旨嚴飭明亮加意振作不得稍留餘力並責  
令慶成承保和衷商榷上緊協剿必能有濟又  
健銳火器兩營官兵此次添調來營者俱不甚  
得力總由平日不能習勞不知喫苦所致除隨  
各前敵打仗外餘俱在開縣防守臣到川後屢  
加訓飭無如訥音不能管束各章京亦多平庸  
兵丁不甚安分此項官兵久留在外旣不得力

徒費錢糧轉爲綠營輕視是以奏明將留駐開  
縣之滿兵全令回京並請

敕下該管大臣嗣後認真訓練庶于軍政有裨

勒保又奏言

臣欽奉

諭旨以

臣

剿辦各股賊匪未能尅期蕝事傳

旨申飭又以兵分見單當酌量情形再行添調新兵  
以資得力仰見我

皇上垂訓周詳矜全策勵之意伏查教匪不靖事越  
三年其狡詐散漫情形非厯次軍務可比議者  
靡不以賊衆兵單爲慮蓋賊以脅而易增往往  
全股撲滅偶有一二習教從逆之人如匪衆所  
稱老教者漏網竊誅又復到處逼脅以致餘孽  
潛滋幾如螟蟥之旋撲旋長此賊之所以衆也  
兵以分而見少川楚陝甘統計征防各兵原不



下七八萬除分撥防堵邊隘外各路征兵自一萬至三四千名不等因賊股較衆不得不先儘大股剿辦以致零星小股無兵跟剿此兵之所  
以單也夫賊衆則須分剿兵單則當議添此一定不易之理以目下賊情而論如果再得一兩路重兵則聲勢自壯原覺易於施展第非僅添數百數千所能濟事必須添調一二萬庶足另

分一兩路攻擊之用然旣欲添兵又須先籌帶  
兵得力之人查現在統領諸臣惟額勒登保爲  
最得兵心非持久經營領者不見其疲卽疲兵  
歸其隊內亦足以成勁旅因此兵皆樂從賊皆  
知畏其餘如明亮久厯戎行雖有聲望然欲其  
不留餘力能得將士之心則不能如額勒登保  
今以調兵而先籌命將頗難其人至各省兵數

除四川湖北陝甘河南現當防堵需兵毋庸再  
計外其浙閩兩江則水師居多道路又遠直隸  
山東則所調已多山西則兵力太軟吉林索倫  
旣緩不濟急四川土兵又所存無幾仍不過在  
雲貴兩廣四省中酌量調派恐不能再得一二  
萬之數卽或勉強湊調而大半俱係新兵紀律  
未諳技藝不純是有調兵之虛名而無剿賊之

實用况添兵必須添餉

國家經費有常自應加意卽省然浮費可刪而不得不用之項卽非定例亦斷不能減今各路兵勇應支分例間因舊餉告罄新餉未來尙不能按月給領倘再添多兵而餉或不繼則將何以接濟臣所以未敢輕言徵調也竊思各路帶兵之人無不以添兵爲得計卽非身親行陣之人亦

無不以添兵爲有濟豈臣身當重任而轉不籌

及於此况臣卽自爲計若此時遵

旨議調不特可洽衆心亦可自佔地步添兵而未能

速完尙可諉過於衆將不添兵而因循貽悞勢

必歸罪於一身臣雖至愚寧不自審如果續調

重兵不過一二月內必能蒞事則不可不調抑

或不添兵而軍務難望成功則又不得不調臣

仰荷

殊恩畀以經畧鉅任凡軍行國計均當處處籌畫是以日夜焦思不得不通謀全局目下兵非必不可用之兵賊非必不能辦之賊行軍之道移步換形如二三月間事機順利卽能辦完冷添祿等三股便覺大有起色四五兩月雖積雨兼旬各路亦屢有斬獲特因未完一股以致上煩

聖心然此時賊勢情形較之去年似覺散漫而其遇  
兵卽竄亦可見賊勢漸窮斷無一兩月間各路  
中不再辦完一兩股之理川省股數雖多現有  
額勒登保德楞泰朱射斗三路剿賊之兵卽不  
能尅日辦完必不致日久無效至陝甘兩省統  
計征兵共有二萬餘名辦理張漢潮張映祥兩  
股臣愚總以併力先滅張漢潮爲正辦緣漢江

以北爲陝西腹地又復毘連豫楚必須先事廓  
清且聞張漢潮人數本屬無多明亮追剿年餘  
未能得手臣核其兵數本有三千餘名今益以

山東兵一千三百餘名慶成到陝合爲一路帶  
有直隸兵一千二百名永保又帶有兵二千名

臣前撥富成軍營之二千名若全行到陝以一  
萬有餘之兵專剿張漢潮一股慶成打仗勇往



臣素知其能身先士卒而永保更當勉力報効

如果明亮等齊心協力臣可以保其速完張漢

潮一完則移師赴甘張映祥更不難辦理彼時

川省如已撲滅數股自可卽冀歲功卽或因賊

股較衆而陝甘之兵全數赴川協剿較之添調新

兵更能得力惟念官兵出征日久勞苦殊甚與

其調兵而多費莫若鼓勵現有之兵心此後或

得一大勝仗或辦完一大股竟當加以重賞白  
無不振作奮興各知自勵現在廣東補額兵九  
百餘名已經吉慶奏明仍令赴川尙未到來

臣

又續查雲貴兩省現有應補傷病遣發及缺額  
兵丁一千餘名亦已分咨該省補派前來

臣惟

有儘此兵力策勵將士趕緊剿辦並隨時囑令  
各路帶兵大員交相勸勉以期及早掃蕩迅速

成功均奏入

上命軍機大臣傳諭勒保曰額勒登保隨時察看賊勢到處攔剿使再添元等併歸一處實爲出力可嘉德楞泰亦差強人意但張添倫旣與樊人傑合夥回川何以又稱不知逃往何處至前此高均德與張添倫同在一處何以此次未經提及務當探明賊踪速爲擒捕朱射斗剿辦包正洪一股亦有

斬獲勒保飭令該鎮盡力窮追所辦甚是惟兵丁  
李廷剛能將包正德立砍下馬並將賊目汪正拔  
一併殺死此等奮勇出力兵丁勒保身爲經畧自  
應一面賞給把總外委頂戴一面奏聞何以摺內  
並未奏請獎賞着卽具奏候朕加恩卜三聘一股  
經七十五堵剿不使闖入楚境所辦亦好其受傷  
陣亡之守備朱映棠邢光周俱着交部賜卹至齊

王氏久經殲戮何以尙有齊家營之稱可見從前辦理未絕根株又再添元係冉文儔之姪上年惠齡剿辦時祇知擊獲首逆邀功居然以肅清川省具奏其實置餘賊於不問以致冉添元得以從容前往西鄉別有勾結勒保與各路帶兵大員斷不可復染積習致干咎戾再勒保奏目下賊勢漸窮毋庸再請添兵且具陳選將籌餉及各省營伍情

形所見已有把握若能於兩三月內兵不增而功速歲以仰慰

皇考在天之靈紓朕宵旰焦勞之意此誠日夜所盼望者勒保係經畧大臣各路軍營皆所統轄務于七八月間將川陝各股賊首全行擒獲其餘竄逸匪衆仍應予數月期限逐一搜捕總須將餘黨蕩掃無遺方可謂之告厥成功又據密陳明亮辦賊鬆

懈等情所言自係公論前因明亮剿辦張漢潮一  
股日久任其往來奔竄並未卽行擒獲已降旨嚴  
飭此奏適與朕意相合至所請訓練健銳火器兩  
營兵丁一節朕自當飭令管理之員實力整頓也  
上又命軍機大臣傳諭額勒登保曰此次用兵以來  
各路領兵大臣惟額勒登保每遇打仗必奮勇爭  
先督兵冒險進擊故所向克捷朕心實深欣慰適

據勒保奏稱額勒登保深得衆心雖疲乏之兵歸入伊隊卽能齊心奮勇兵丁無不樂從賊匪俱知畏懼額勒登保實屬可嘉但伊前任領隊侍衛時先登陷陣奮不顧身固所當然今職司叅贊乃國家倚重之大臣所關緊要嗣後凡遇擊賊宜加慎重愛身惟當相機指示不可仍前爭先冒險要知賊所畏懼之人卽其所切恨之人額勒登保圖報



朕恩固知大體然不可奮勇而輕於視敵此爲至

要

十九日

丙午

倭什布奏言

臣

接據防守竹葉關之

叅將海麟防守西面河之守備王有稟報賊匪

由石寨河竄至文彩溝謝家灣一帶距竹葉關

黑山頂邊卡茲近

臣

查竹葉關西南大小湖溪

山梁最爲扼要隨飭海麟酌帶兵勇赴湖溪迎

堵飭王有酌帶兵勇赴黑山頂迎堵並派副將  
孫清元帶兵八百名前往策應初四日賊匪果  
分股向湖溪黑山頂兩路窺伺適海麟王有均  
已到彼各用鎗礮轟擊該匪均卽退向謝家灣  
屯聚海麟率同守備胡宗典等乘勝由湖溪追  
至謝家灣擊剿賊匪一見官兵直前奔竄兵勇  
施放連環斃賊十餘名匪衆翻越老林向藍旗

溝石店河奔逸王有探知賊人所向以石店河  
有路可通西面河隘口恐賊匪向東衝撲河卡  
該守備一面酌分兵勇駐守黑山頂卡一面帶  
領兵勇連夜馳至西面河防堵初五日黎明賊  
匪卽由溝內繞出西面河梁之東蜂擁而上直  
撲卡座該守備將兵勇分開隊伍鎗手在前矛  
手在後排列卡內先用鎗礮轟擊該匪並不稍

退且有乘鎗烟密佈時撲近卡牆竟欲跳壕衝入者經矛手兵勇奮力擊刺連斃五賊衆匪不敢近前王有率同千總王國華楊大壯鄉勇頭陳朝贊等從卡內躍出擊斃衆兵勇俱各奮勇異常相繼躍出自上下壓斃賊六十餘名其時臣派往策應之副將孫清元亦帶兵趕到該匪見有官兵踵至益形惶急紛紛向三墩坡及鎮

坪一路逃匿該處山高林密未便深入窮追當  
將兵勇撤回查此次賊匪侵逼卡隘因各卡皆  
有準備得以卽時截回未被一名闖入惟該匪  
現在退屯平利鎮坪地方距竹谿西南各卡仍  
不過十餘里數十里不等此外平利縣屬之媽  
蝗壩豐口壩等處尙有餘股紛竄又川省大寧  
縣屬之羊橋壩亦有賊股滋擾均有進逼楚界

之勢防範不可稍懈臣連日以來分投查察督

率文武員弁兵勇加緊堵守至張漢潮一股前

月竄至陝省商南境內與鄆西東北邊界漸近

臣嚴飭分防該處之道員恒慶叅將朱廷荃等

分段嚴防今該匪經明亮吳熊光合力截剿折

回陝省商州臣恐其復竄山陽鎮安等縣鄆西

西北兩面與山陽鎮安毗連均關緊要復飭恒

慶朱廷荃等隨時探蹤迎堵總不使賊匪竄入  
楚境現在該匪已由商州西竄不致由豫入楚  
襄陽一帶甚爲寧謐再臣前此籌議安插難民  
事宜只爲一時分散起見議將年壯無業之民  
分撥各站充夫仰蒙

聖明訓示不勝欽佩感愧臣查四月內陸續投出及

臨陣擒獲難民其籍隸川陝者臣已發路票口

糧送回川陝原籍內有本省難民一百四十名  
大半係竹谿竹山民人甫經被擄本皆有業之  
戶卽已就道還回復業間有一二房縣等處民  
人年壯無業者爲數無多已飭發各原籍州縣  
安置均水分撥各站充夫現在川陝招集難民  
尙未有遞送到楚者將來遇有此種來歸無業  
之民臣當謹遵



諭旨分撥工所加人數稍多再隨時酌量情形設法  
分散妥爲安插務使於安撫之中仍寓防閑之

術奏入

上命軍機大臣傳諭倭什布曰石寨河一股賊匪向  
湖溪黑山頂兩路窺伺經倭什布分派將弁帶兵  
迎堵奮力截擊不令賊匪闖入楚境此皆倭什布  
布置得宜所辦甚好惟此股賊匪究係何人爲首

是否卽係高均德何以未據奏明至守備王有於  
賊匪奔竄石店河時慮其向東衝撲西面河卡卽  
帶兵勇馳往奮擊斃賊六十餘名賊匪始行潰逃  
甚爲出力著倭什布察看該弁嗣後剿殺賊匪再  
能奮勇向前卽以應陞之缺陞用

同日慶成奏言張漢潮股匪由商確竄出

臣正

擬督兵迎擊間旋據探報賊蹤漸近藍田咸寧邊

界查陝省兵力分防不能週徧雖有叅贊明亮  
緊躡追剿恐該匪分股由南山峪口突出西安  
省南村莊稠密必致驚惶臣卽於初七日率領

官兵由華州渭南一路星馳迎赴途次聞得該  
匪竄至距省百餘里之大峪口地方旋即折向  
孝義五郎一帶重山奔竄該處在省之西南山  
徑叢襍在在接連北棧西通甘境臣於途次接

明亮札知奏明四面分布堵截擬與臣各帶兵

勇居中奮擊又接松筠永保來信刻下甘省所

剿白號賊匪已入川境恐藍號被剿奔回棧道

東西兩面均關緊要永保已分兵堵截尙覺力

單擬俟臣到彼看何股竄近卽合力先行剿辦

各等語軍情移步換形固難懸揣而張漢潮在

陝壺綴最爲可惡察其所竄方向其意急圖合

夥茲北棧喫緊永保處兵力較單臣自應帶兵

馳往會合諒明亮之兵必緊躡前來臣等正可

趁此機會併力奮擊不使竄匪歸合先滅此股  
則軍威益壯其勢自如摧朽奏入

上命軍機大臣傳諭慶成曰張漢潮股匪折向孝義  
五郎一帶奔竄而甘省所剿白號賊匪已闌入川  
省南江地方兼恐藍號賊匪被剿奔回擾及棧道

此二事業據松筠奏報慶成接到松筠等札會以  
北棧緊要永保一路兵力較單卽帶兵馳往會剿  
所見亦是慶成既定計與永保會剿白號賊匪卽  
當專注此一路協力剿辦不可因接有明亮等札  
會意存游移倘張漢潮一股向西奔竄欲圖合夥  
慶成等卽可與明亮併力奮剿迅就殲擒也

二十日

丁未

廣厚奏言白號賊匪現由畧陽之黑

河東竄距甘省較遠且敗殘之餘可不慮其折

回惟藍號賊匪尙在階州東南邊界滋擾臣等

卽日帶兵由田家河一路探蹤前進以期與恒

瑞等兩面夾擊及早肅清甘境奏入

上命軍機大臣傳諭廣厚曰藍號賊匪尙在階州邊

界廣厚吉蘭泰果能與恒瑞併力夾擊於本省境

內剿除此股必當加之懋賞廣厚吉蘭泰係甘省

官員原當固守疆圉不必越境遠追但祇將賊匪  
驅出甘省肅清本境仍屬無過無功若能撲滅卽  
係伊二人之功至恒瑞則係帶兵大員不得以賊  
匪已離甘境遂謂「事必當追蹤至陝再次調  
來之撒拉爾回兵打仗奮勇又能恪遵軍紀甚屬  
可嘉若剿盡藍號賊匪後未便祇令在界上駐守  
著廣厚等酌量情形如回兵等情願至川陝境內



剿賊卽派往恒瑞軍營隨同追剿白號賊匪及張  
漢潮一股倘伊等不甚踴躍卽當厚加賞賚遣回  
本處至甘省兵勇仍當在邊界堵禦不可遠出鄉  
勇離鄉則無勇派往必不得其兵丁等皆有巡  
防要隘之責若調往他處後賊匪又乘間折回廣  
厚吉蘭泰無兵可甲又將何以禦之耶

二十一日

戊甲

恒瑞奏言藍號一股賊匪目富成

向南跟剿後總在階文一帶大山老林內往來  
游奕窺伺渡口其沿江豆黃峪外那壩臨江舖  
帶羅山畢口姚家渡等處尤關緊要惟臣一路

兵力勢難兼顧當卽飛札階州知州將各處渡  
船盡行撤去其水淺處所集勇嚴堵隨令總兵

觀祥副將九十帶兵一千名紮住寶珠寺扼其  
要路總兵凝德於擊楊之震帶兵一千名在三

曹河堵截並令廩貢生易萬里帶領鄉勇三百  
名翻山繞赴江邊小路相機前進

臣帶領副將

德忠侍衛巴彥等馬步官兵一千二百名由

五福河進剿賊匪正在帶羅山屯聚

臣卽帶兵

趕緊前進適易萬里已繞至江邊賊匪探知東

南兩路官兵齊來卽沿江折向北竄易萬里帶

領鄉勇在後吶喊追殺

臣帶兵從旁掩擊斃賊

三百餘名賊遂翻山捨命狂奔臣一面飛調疑

德由三曹河帶兵前來一面挑帶勇健馬步官

兵一千四百名鄉勇二百名裹帶乾糧兼程追

至老栢樹地方趕上賊匪該逆一見卽搶佔山

梁恃險抗拒臣派令侍衛江鼎佐領祿成圖敏

帶領馬兵從左邊進攻都司劉應魁廩貢生易

萬里帶領兵勇從右邊密林內進攻臣率領總

兵疑德副將德忠遊擊李天林全亮帶兵由中路進攻賊匪有擲石吶喊放鎗抵禦三路兵勇不避鎗石奮力仰攻賊匪力不能支卽從山後敗走我兵追殺二十餘里斃賊六百餘名擒獲二百十三名內除被裹難民張成順等九十二名釋放外餘俱正法其乘間逃散被裹難民甚多餘匪直向東北長壩一帶奔竄

臣

飛札總兵

觀祥由西面草川子等處兜截臣率領官兵蹶

蹤追剿並札知廣厚吉蘭泰卽在東北迎頭截

擊查此股賊夥合之裹脅平民不過三千餘人

經臣連次剿殺並逃散者約計過半勢已窮蹙

臣惟有鼓勵將士趕緊剿辦肅清甘境至此次

打仗遊擊全亮首先帶兵上山中鎗陣亡弁兵

亦間有傷亡另行咨部臣所帶官兵前在川省

剿賊一年有餘俱屬奮勉今在甘省打仗數次  
實在奮勇臣擇其尤爲出力者十五員另繕清  
單恭呈

御覽仰懇

天恩加之鼓勵其餘奮勉之將弁二十七員卽遵  
旨咨部議敘奏入

上命軍機大臣傳諭恒瑞曰甘省白號賊匪前經恒

尙會同廣厚吉蘭泰等併力逼剿不使闖入川西  
完善之地其藍號賊匪在階文一帶遊奕恒瑞督  
率將弁兵勇分路掩擊共殲賊九百餘名賊匪俱  
向東北奔竄不致擾及川西邊境實爲出力可嘉  
恒瑞前本賞戴雙眼花翎後經革去今截剿賊匪  
屢次奮勇已經交部議敘著加恩先賞戴單眼花  
翎用示獎勵至廩貢生易萬里率領鄉勇翻山繞



赴江邊小路奮勇進攻朕披閱時卽欲將該生加  
恩及關恒瑞所奏軍內已將易萬里保列似此打  
仗出力之人自應加之鼓勵其殺賊陣亡之遊擊  
全亮並著咨部賜卹此股賊匪所剩不過千餘人  
昨據廣厚奏報已在甘境奮力截剿恒瑞務須乘  
賊勢窮蹙之時躡蹤追剿與廣厚等兩面夾擊速  
行撲滅以副委任

上諭內閣曰恒瑞奏官兵戡剿甘省藍號賊匪所有帶兵將領及義民等連次接仗實爲奮勇出力除恒瑞已賞戴花翎外其二等侍衛江鼎著陞頭等侍衛協翎額爾起副將德忠俱著賞戴花翎佐領圖敏著賞給沙拉瑪蓋巴圖魯名號遊擊李天林著賞給碩瑪蓋巴圖魯名號驍騎校德楞額前鋒春格千總劉國興楊存福孔光祖劉經把總單懷

義外委曹天佑俱著賞戴藍翎湖北義民首盧貢  
生易萬里隨同恒慶屢次剿賊今又率領鄉勇翻  
山繞赴江邊小路奮勇進攻甚爲出力易萬里著  
加恩賞給五品頂戴歸部以通判選用陝西巡檢  
崔查隨同恒瑞在川帶領鄉勇打仗出力並查辦  
投出難民散給路票盤費均能實心亦著加恩以  
縣丞卽用用示鼓勵

欽定剿平三省邪匪方略正編卷一百七

己未年

六月二十四日

辛亥

恒瑞奏言藍號賊匪被剿情

急直向東北狂奔

臣

躡蹤追剿一面派令總兵

觀祥帶兵由小川子一帶兜截杜其西竄之路

並札知廣厚吉蘭泰在北面截殺該匪探知三

面俱有官兵卽折向東竄廣厚等帶兵趕至華

垣子追殺一百餘名逃散被裹難民數百名餘

匪不滿千人竄出畧陽適臣亦趕至徽縣與廣

厚吉蘭泰相晤查白號賊匪於六月初一日已

由畧陽南竄有折回川北之勢今藍號餘匪雖

亦跟蹤潛逃但恐由沔縣東奔擾及漢中亦屬

可慮臣等公同商酌令廣厚吉蘭泰帶兵防守

甘省邊界並札催總兵索費英阿由階州前來

協同分堵要隘臣由兩當鳳縣直出褒城如藍

號賊匪向漢中一帶奔竄正可迎頭截剿若與  
白號尋蹤會合竄回川北臣卽就近會同明亮  
等剿辦張漢潮一股務令陝境一律肅清上紆

聖厯奏入

上命軍機大臣傳諭恒瑞曰恒瑞因白號股匪已由  
畧陽南竄卽帶兵就近赴明亮等一路會同協剿  
張漢潮一股所見甚是恒瑞係西安將軍非如廣

厚吉蘭泰應在本省守禦者可比現在棧道東西  
有慶成松筠永保堵剿甘境有廣厚吉蘭泰防守  
即使藍白二號會合竄回川北該處有勒保督剿  
均無須恒瑞幫辦自當帶本管之兵速赴明亮一  
路務將張漢湖一股賊匪殲滅肅清陝境用副委  
任

上又命軍機大臣傳諭慶成松筠永保曰恒瑞等奏

現在藍白二號賊匪俱已先後竄出甘境恒瑞擬由褒城前往會同明亮剿辦張漢潮一股廣厚吉蘭泰俱應在本境防堵此時截剿藍白二號係慶成松筠永保三人之責若令賊匪南竄川省或從西北折回甘肅則咎將誰諉慶成帶領直隸兵一千六百名而富成原帶之兵現歸松筠統領兵力不爲不厚永保處雖覺兵單茲已與慶成同在一



處况藍白二號之賊屢被甘省官兵剿敗爲數無  
多更易設法截擊不可不倍加奮勉也至慶成初  
接明亮知會本擬與明亮居中追擊嗣得松筠永  
保之信又帶兵馳往漢中是慶成既不願與明亮  
剿辦張漢潮一股而與永保會合後又不思將藍  
白二號之賊認真剿辦究以何股賊匪爲慶成專  
責豈非帶兵懸宕兩無所屬耶且慶成係成都將

軍非松筠永保之身任陝甘督撫可比倘令藍白  
二號賊匪俱由畧陽南入蜀境滋擾川北地方慶  
成更不能辭咎矣至永保初次在華陽遇賊接仗  
未免輕進損威及回至鳳縣寶雞亦不過料理運  
餉之事今餉鞘想早出陝境近日亦未見永保剿  
辦何股賊匪得一勝仗前此白號之賊過畧陽時  
永保尚可藉詞未到今藍號之賊又由畧陽奔竄

正值永保帶兵在彼豈可又任其南竄與白號接  
踵合夥乎永保當趁勢殲擒不得以驅出陝甘境  
地卽爲了事若慶成在陝將藍白二號賊匪剿盡  
卽當帶兵仍赴明亮一路會剿張漢潮一股不可  
稍有觀望

同日廣厚奏言

臣

與吉蘭泰由田家河一路前

赴階州迎剿藍號賊匪至下店子地方忽報藍

號賊匪經恒瑞在帶羅山老栢樹等處連次痛  
殲卽由小川子追趕前來該匪已竄至成縣之

雙龍溝弋陽川有北趨秦州之勢臣查嶽成兩

縣節氣較早麥收已畢百姓多避入堡寨惟秦

州正當刈穫之時農民遍野若復遭其蹂躪不

但賊匪可以掠食抑且易於裹脅良民臣遂與

吉蘭泰帶兵由富家鎮前進迎頭兜剿卽以屏

蔽秦州詎賊匪偵知我兵逼近不敢北竄卽由  
蕪堽子向南山奔逸查華堽子山徑險峻只容  
二人一騎且時值大雨登陟尤難臣等因將帳

房等項留存挑選健勇馬步兵二千名並撤拉  
爾回兵率領候補遊擊陳五輯署同知縱司燭  
等躡蹤掩殺賊匪十分情急卽捨命窮奔連夜  
淌渡白水江竄赴陝省畧湯縣之麻柳溝仍係

白號前次奔竄路徑亦不致闌入川西完善之  
區此次追殺賊匪因山陡路滑我兵間有墜跌  
傷亡僅殲賊一百五十餘名滾巖淹斃者數十  
人本地被擄之人乘機逃散者約四五百名生  
擒張世美楊添士等十八人訊係正賊均卽正  
法除傷亡兵丁另詳咨部外臣與吉蘭泰仍遵  
旨

首在邊界防堵不令折回並派撥將備搜捕藏匿餘

匪一面通飭各州縣以賊匪全數出境令其曉諭居民趕緊復業俾就寧貼其打仗出力員弁謹開單呈

覽再查撒拉爾回民連次跟隨官兵在深山之中雨淋日炙打仗殺賊頗知出力其沿途行走復能

聽受約束不敢滋事臣見其急公出於真誠除

查照上次之例給與行裝坐餉口糧外並宣諭

皇上恩旨分別酌賞銀牌羊茶等物該回民感激歡

呼愈圖報効此內總約韓四個頭目韓哈六十

等帶領回民尤爲出力又查該回民告請來營

原係幫同剿捕此時甘省一律肅清止須防堵

要隘臣與吉蘭泰所帶之兵已數分撥臣現在

飭令該回兵暫行歇息俟藍號賊匪竄遠卽遵

旨厚加賞資派委委員照料回巢奏入



上命軍機大臣傳諭廣厚曰：監號賊匪竄至雙龍溝，有北趨秦州之勢。廣厚、吉蘭泰帶兵由富家鎮迎頭兜剿賊匪，奔赴畧陽，不致闖入川西完善之區。皆係廣厚、吉蘭泰之功，所辦甚屬可嘉。此時賊匪雖已離甘境，廣厚不必卽回省城。現在蘭州有楊揆、蔡廷衡足資經理，廣厚仍當在邊界防堵。爲是至此，次調來之撒拉喇回兵打仗奮勇恪遵軍紀。

殊爲可嘉前經諭令廣厚等如該回兵情願至川  
陝剿賊卽派往恒瑞軍營幫剿張漢潮等股匪今  
據恒瑞奏已於六月十八日帶兵由畧陽趕赴明  
亮軍營離甘已遠可不必再令回兵趕往但藍白  
一二號賊匪或因畏懼回兵先後竄出甘省今若卽  
令回兵回巢恐賊匪探知復思窺伺甘境此時或  
將該回兵等一面賞給一面令其暫在邊界駐扎

俟賊匪離甘已遠可以無須防堵時再令回巢未  
爲不可總在廣厚酌量情形妥爲辦理

上諭內閣曰撒拉爾回兵跟隨打仗急公踴躍甚屬  
可嘉已據廣厚分別酌賞外其總約韓四個著賞  
給守備頂戴頭目韓哈六十等九人俱著賞給千  
總頂戴又據奏打仗出力員弁守備李殿魁候補  
千總竇得俱著賞戴藍翎巡檢席濂現已加捐縣

丞著留於甘省遇缺補用

二十五日

壬子

倭什布奏言本月初五日撲擾竹

谿西面河卡賊匪經兵勇擊退後竄至平利鎮

坪一帶去邊界不遠

臣

恐其復來窺伺督飭各

卡加緊防堵初六七等日該匪分出多股百十

為羣於西南一帶邊界外分投焚擾

臣

接據探

報知賊人詭計欲使兵勇知處處有賊莫辨其

蹤跡所向且故示人數無多誘兵勇出卡追擊  
其大股賊衆得以繞道衝入情形實爲可惡

臣

一面飛飭各卡兵勇嚴密堵守並將湖溪交子  
園等處深林小徑或砍伐木植填塞或刨挖溝  
塹扼堵一面飭帶兵策應之副將孫清元確探  
賊蹤虛實率兵迎截初十日五鼓孫清元探知  
大股賊衆約有二千餘人從皮風溝仍向西面

河一路前來該副將人守備王有督率兵勇守  
住卡座親率守備張建業千總金洪嗣等分帶  
官兵先於卡前左右兩山設伏逾時賊衆果由  
皮風濤衝出直撲西面河山梁該副將待賊上  
至半山分兵兩路突出抄擊賊匪恐截其後隊  
卽行折退該副將等併力衝擊斃賊二十餘名  
將執旗賊目陳世鳳擒獲該匪折向乾竹河奔

逃官兵直前趕殺賊匪因躡剿緊急反身抵拒  
官兵奮勇剽殺復斃賊四五十名並生擒吳世  
瑤等四名餘賊復望鎮坪狂竄該副將因離卡  
已有二十餘里不便前追將官兵撤回連日續  
加偵探該匪已竄往西南毛壩大小樹河一帶  
距西面河一百餘里其分擾西南邊外之匪亦  
已逐股退至南江河地方不致如前逼近其餘

平利境內前竄豐口壩泉河賊股現在西竄岸  
田壩白沙河等處相距邊界亦均有百餘里惟  
據探報大寧羊橋壩一股賊匪竄至徐家壩與  
竹谿南面西溝竹山南面張公橋等卡俱近

臣

因令孫清元移兵西溝一路以備策應令千總  
黃富國帶領鄉勇移赴張公橋一帶會同守備  
羅陞迎堵此次擒獲活賊五名訊知屢撲西面



河卡一股賊首係張起貴小頭目係張馱內陳世鳳一名係執旗賊目其吳世瑤等四名皆執有鎗矛與官兵抗拒並身帶經咒抄本顯係習教匪犯當卽正法搜出經本語多鄙俚業已燒燬出力員弁當經分別獎賞奏入

上命軍機大臣傳諭倭什布曰倭什布前次奏到地圖西面河張公橋一帶共設有十七卡計有兵勇

七千餘名散之各卡每卡止四五百名今賊匪有  
二千餘人倭什布督飭將賊截回尚屬無功無過  
惟此股賊匪究係何股分出楚省邊境向係張添  
倫高均德在彼游奕現在張添倫已竄入川境惟  
高均德一股久無下落或此股賊匪係高均德分  
出詭稱張起貴姓名亦未可定現據倭什布拏獲  
賊匪搜出經本或係高張二逆之外另有新起小

股何以並未查明具奏至所稱孫清元由西面河  
追剿賊匪賊向鎮坪狂竄孫清元因離卡二十餘  
里不便前追將官兵撤回一節似近畏避光景前  
令倭什布等不必越境遠追者原慮賊股較多若  
越境追逐遠至四五百里之外則邊守空虛轉恐  
竄匪或乘間折回難以堵禦是以諭令固守本境  
爲重今孫清元所追之賊離卡二十餘里豈有賊

蹤相距不遠竟任其奔竄輒將官兵撤回之理設  
或追剿賊匪業已得手所餘竄匪無多亦拘泥不  
行窮追致賊匪不能殲淨又留餘孽坐失事機豈  
不可惜此次孫清元追賊或不免心存畏蕙不敢  
前進抑或因所帶兵勇稍有挫失而孫清元以不  
便窮追爲詞均未可定此時賊去已遠倭什布亦  
不必向孫清元深究已往但須戒其將來諸事務

期核實若果有此情節豈可稍涉含混勿謂朕未  
經看出也並令倭什布傳知各卡嗣後追剿賊匪  
如距卡不過數十里總宜乘勢追擊不得因賊已  
離卡卽行撤回也

二十六日

癸丑

福寧奏言月前竄匪充斥運道梗

塞當經勒保撥兵疏通旋卽暢達不意邇來各  
州縣協運各路軍糧仍復處處遇賊耽擱背夫

多被衝散其傷斃搶失者亦復不少現據川東  
川北各府廳州縣稟報各股賊匪多者萬餘少  
則數千及千餘不等或竄擾市場或攻圍山寨  
甚或假扮兵勇商客往來游奕乘鄉民無備肆  
其裹脅故黨與日見其多首逆亦日見其衆除  
舊有賊目徐添德王登廷包正洪張子聰鮮大  
川卜三聘張添倫辛聰龔健樊人傑龍紹周唐

大信之外復新添譙城顏中考方文祥冉添元  
王珩羅半年雷思榜張紀李光輔于綱等匪率  
其醜類四出紛擾其餘黃號藍號白號黑號之  
零星股匪不知賊首姓名者尚多刻下額勒登  
保督兵進抵通江德楞泰在太平七十五朱射  
斗等在夔州開縣一帶日夜兜擊非不力加奮  
勉然年來脅從之賊實多於剿除之數兼之官

兵連歲出征難免疲乏加以傷亡相繼爲數漸少至賊匪爲逆日久狡獪兇悍較甚於前以山林爲憩息之地以村落爲掠食之區百姓棄廬舍而居險阻賊匪百計憑陵破其寨砦攫所有以自裕又收少壯丁男以爲前驅愚民初則畏死順從繼因身陷賊黨亦遂無所顧忌卽逃出難民官給口糧路票令其回家者固所時有究



之結黨成羣之賊卒未解散是以現在川省竄  
匪較之上年實有增無減地方之傷殘更甚黎  
庶之疾苦更深勒保非不夙夜籌策日盼事機  
順利奈賊衆兵單誠有莫可如何之勢 臣 職任  
軍儲本不敢越俎冒陳特以受

恩深重目擊賊愈剿而愈熾餉徒費而罔益關係至  
鉅實不敢壅於上

聞臣愚見以川省賊匪不可再事因循仰乞  
聖主特加睿斷出萬全之

廟筭俾得迅蕙事功奠安巴蜀

福寧又奏言伏念各路軍營支用餉項必須統  
計官兵之多寡自月之久暫始足較其盈絀臣惟

勒保單開自到川接辦軍務以來所有惠齡富  
成七十五及各總兵所帶官兵均隸勒保一路

故上年兵勇多至五萬少亦不下二三萬名隨時抽撥分合無常現在存營兵勇不過四千九百餘名又額勒登保從前止帶兵三千餘員名後增之九千有奇德楞泰原帶兵七千餘員名嗣陸續添至一萬二千有奇核計各營用項勒保軍營自上年二月<sub>臣</sub>接辦之日起截至今年五月底止計十六個月共用銀二百零五萬兩

額勒登保軍營自上年九月起截至今年五月  
底止共用銀二十七萬二千兩德楞泰軍營自  
上年六月起截至今年五月底止共用銀五十  
五萬五千兩此卽三路兵數銀數實在情形也

臣

前此所以未將勒保額勒登保兩路具奏者  
緣勒保前係總統繼膺經畧重任儲備是所兼  
管且上年在安樂坪祖師觀圍剿王三槐冷添

祿兩大股賊匪時歷半載兵勇數萬費用本繁

臣

因其功屆垂成每遇調取銀兩卽如數撥發

從不肯稍有拘泥致使辦理掣肘至額勒登保

爲人體面

臣

前在湖北會剿覃加耀賊匪共事

年餘信之有素上年帶兵入川見其諸凡節省

所撥餉項均聽隨營支放自無庸過爲稽察瑣

屑瀆陳至德楞泰上年復入川境勦賊據樹員

稟報每月約需銀九萬餘兩因爲數過多

臣當

卽確切根查杜其虛糜之漸邇來德楞泰頗知  
檢束雖該一路供支仍未能悉照分例然實無

別項侵冒情弊

臣

前因德楞泰三月間追賊深

入老林運道梗阻屢接來信總言餉銀不繼又  
四月初七日勒保復德楞泰所寄清字書函令  
道員石作瑞叅將張績持送

臣

閱看內有前在

陝省撥餉寬裕故諸事妥當及抵川省總不發餉以致剿辦掣肘等情臣察看德楞泰之意竟

諉諸缺餉貽誤而勒保亦幾信以爲實比聞德

楞泰所帶之兵馬多跌斃人多跣足極爲狼狽

設有不測臣實不能當此重咎故前摺內將正

二兩月撥給銀數據實奏明又設法先後解銀

六萬兩以資接濟竊念各路軍費浩繁卽省之

又省而勢所必需之項總不能固執成例槩行  
裁汰是以月前勒保會同臣條奏各款委係斟酌  
酌再四臚列上

聞籲懇

天恩倘一經部駁則無著之費更屬不可勝計刻下  
正值剿捕萬緊之際勢難澈底清釐祇有仍照

臣原奏俟事竣調集各營細賬按款核算察其



浮用分別追賠以歸覈實再川省節次請到餉  
項均係隨時酌量數日分撥成都保寧達州三  
局收貯凡各軍營需用銀兩近在川北者卽向  
保局支領近在川東者卽由達局撥給其製辦  
軍裝軍火以及採買穀石購備馬匹悉於省局  
動用此外如各站暨各州縣所需運腳安設  
塘鋪並各處防兵勇鹽菜等項各按派定地

方分向三局關支仍按旬摺報經畧及

臣互相

稽察凡係何員經手之項將來卽責成自行造

報其達局所發銀兩俱由總理道員具詳

臣察

核批准後始照數發給各該營總理及隨營糧

員取具印收爲據至如何零星散放各有承辦

專司其事

臣

駐紮達州距各軍營及各州縣自

數百里至千里不等雖不及遍歷周查分身經

理登經嚴飭各員確實供支並不時密差暗訪  
不使稍有侵蝕臣總因賊勢散漫誠恐餉項莫  
繼不得不力加樽節而各文武員弁鮮不嘖有  
怨言若再心存偏向更難免指摘交加惟祈

宸衷淵燭俯察愚忱臣實不勝激切感悚之至奏入

上命軍機大臣傳諭勒保曰福寧奏川省賊勢除舊  
有賊曰徐添德等外復新添譙城等十名其黃號

藍號白號黑號三令星股匪尚多較之上年實屬右  
增無減自係實在情形覽奏殊深厯切朕前以川  
省賊匪較多奔竄無定官兵往來追剿不免疲乏  
恐一時未能竣事屢經降旨諭令勒保察看情形  
將應否添兵之處據實具奏旋據勒保奏稱目下  
賊勢漸窮儘此兵力剿賊毋須再請添兵朕方以  
勒保已有把握故爲此言今福寧所奏匪徒愈剿

愈熾賊衆兵單與勒保前摺大相逕庭福寧目擊  
情形直陳無隱摺內羅列賊目俱係確指姓名斷  
無憑空捏造之理勒保與福寧俱駐達州若賊股  
日漸增多福寧知之而勒保毫無聞見則是昏憤  
糊塗幾同木偶大負委任如勒保明知賊勢如此  
隱匿不奏轉以不必添兵可期滅賊爲詞其意實  
不可解況兵添而賊可速平飲至郊勞皆勒保身

受榮寵藉眾兵之力成一將之功即使勒保自爲計亦必籌畫萬全冀膺懋賞何以祇圖目前粉飾以功易罪耶且閩福寧所奏勒保一路兵餉之數計每月需銀十二萬餘兩是大營之費爲數獨多朕授勒保爲經畧原賴其調度運籌不責以衝鋒打仗之事從前經畧多係如此今勒保駐劄達州以來未見其相機布置決一勝策祇知安坐大營

虛糜厚餉每閱旬日不過將各路軍情奏報一次  
藉以塞責想其意不欲賊匪卽平經畧事權可以  
久擅殊不知量能授官外省總督如不稱職卽應  
更易而况經畧重任轉可稍事姑容致悞軍務耶  
况朕遇事總期核實從不取吉祥虛語厯降諭旨  
甚明勤保於行軍大事竟爾粉飾入告是誠何心  
卽或因從前未請添兵爲始終文飾之計亦不當

迴護至此目前摺所論明亮之語亦未免忌功嫉  
妬勒保著傳旨申飭此時川北賊匪既有增無減  
黃號藍號白號黑號及各股賊匪約計究有若干  
據實入告不可以多報少勒保曾派何人剿辦以  
現有之兵剿現有之賊何時可以尅期完竣又前  
摺何以並未將此增添賊股奏明有何把握輒稱  
賊勢漸窮無須添兵著勒保逐一據實明白覆奏



毋得再有隱飾

上又命軍機大臣傳諭福寧曰福寧奏各路軍餉數目勒保一路軍營每月支用銀十二萬餘兩額勒登保一路每月支用銀三萬餘兩德楞泰一路每月支用銀四萬餘兩各處軍營兵數多寡不一則支用餉項爲數不同自係實銷諒無浮濫其另摺所奏川省賊匪情形具見直陳無隱深堪嘉

獎卽以此奏觀之其支放各路軍餉必不肯瞻徇  
浮冒更屬可信現將福寧原奏抄寄勒保閱看如  
勒保因此心懷嫌怨媒孽其短斷難逃朕洞鑒福  
寧惟當諸事認真一心對朕倘勒保有故事搜尋  
之處福寧當據實查叅不必稍存顧畏也再所稱  
藍號白號賊匪是否卽係甘省竄出藍白二號闖  
入川境之賊抑係該處新起者並著福寧查明具

奏

二十九日

丙辰

松筠奏言臣

行抵漢中會同永保

分兵追截白號賊匪永保帶兵入棧其富成原帶之雲貴陝甘兵二千三百餘名陸續到齊臣將各兵衣履器械糧餉備辦齊全派原帶將弁管領隨永保行走迎交慶成統領其富成原帶四川鄉勇一千五百名河南鄉勇五百名隨營

兩年遠行裁撤恐滋事端若能整頓鼓勵嚴加  
約束尚屬可用查王文雄現在西鄉堵禦東西  
兩路賊匪兵力不敷

臣

將該鄉勇衣裝口食備

辦完妥派弁帶赴西鄉交王文雄汰去老弱疾  
病者共得精壯鄉勇一千八百名可期得力茲  
據派往追剿白號賊匪帶領四川官兵之遊擊  
楊國林等稟報賊匪因官兵追剿緊急由山僻

小徑竄至四川廣元之轉斗舖又竄至神宜驛

山後之石竹堡大竹壩一帶臣思川北地方皆

賊匪蹂躪之餘百姓多據寨自保賊匪無所得

食恐其仍行折回川境而藍號賊匪經恒瑞在

老栢樹勦敗後向東北窮奔廣厚吉蘭秦自嶽

縣帶兵迎擊賊匪隨從小坻壩於嘉陵江上游

水淺之處淌渡過江至畧陽沔縣境內焚掠現

在恒端由徽縣兩當入棧追趕過其東竄廣厚等駐守徽縣邊界賊匪不能竄向西北勢必仍

南竄回川

臣

隨飛飭楊國林等暫駐廣元寧羌

交界一面防堵白號賊匪折回一面相機截擊

藍號賊匪至陝省西鄉境內分竄邪匪一股在

東路八廟河觀音堂一帶一股在西路天池寺

黨池壩一帶經王文雄於鍾家溝堰口峽口舖

子山楊柳山各要隘親督兵勇分佈防堵甚爲  
嚴密其紫陽境內阮正通一股賊匪從界嶺過  
大小亮埡撲縣屬之小盆山寨經義首董爾魁  
等率勇截堵殺賊數十人賊匪仍退入川境惟  
平利境內一股竄匪約有三四千人由葭草河  
竄至龍鬚埡義首張奎徐名揚吳大章等帶領  
鄉勇擊殺頭隊賊匪八十餘人追至高河梁大

隊賊匪踵至四面攻撲相持一晝夜彼此殺傷甚多因寡不敵衆營盤被賊衝破張奎等三人不知下落賊匪遂分爲二股均奔至孟石嶺道員溫承惠帶安康鄉勇八百名馳至平利令本地鄉勇一千二百名堵住毛家壩防其北竄總兵慶溥帶兵由磚坪至獅子壩迎頭截擊臣又飛飭溫承惠督率地方官口多聚鄉勇以助聲勢



漢江水漲賊匪斷不能偷渡深入其張漢湖賊  
匪自豫省折回西竄又至洋縣境內明亮躡蹤  
追擊慶成已自寶雞入棧與永保會合兩面夾  
擊現奉

諭旨飭令川陝河南所屬地方仿照湖北隨州之法  
堅壁清野以期賊蹤斂戢不敢肆行侵擾查陝  
甘境內經賊匪往來蹂躪受害甚慘民間多有

建立堡寨自行保聚者因勢利導其事較前此  
爲易惟恐不得地形不設守備有名無實終歸  
無益臣已分飭各州縣曉諭居民以此等賊匪

東奔西竄本無伎倆如果齊心合力據險固守  
賊匪斷不能攻城破寨旣不受屠戮之害且可  
助官兵之勢百姓皆知趨吉避凶自必踴躍從  
事地方官再爲之擇地擇人詳悉教導深溝高

集三子習之身系才二一  
壘置備兵械酌給火藥練習鎗砲平時所有積  
聚盡置其中賊至登陴固守各護身家必能得  
力一處如是處處皆然賊匪往來千里無所得  
食官兵追躡其後未有不窮感潰散者於剿堵  
事宜實爲有裨臣現飭令各道府董率稽查以  
期迅速集事甘省現已肅清騰出恒瑞一路之  
兵或陝或川皆可相機會剿明亮一路新添山

東兵一千三百餘名陝甘補額兵一千餘名慶  
成一路新添富成兵二千三百餘名合之兩路  
原帶及永保之兵聲威壯盛以此剿辦張漢潮  
一吸賊匪似足敷用此股殄滅移兵剿辦川陝  
交界各股賊匪不難以次掃蕩至部撥陝餉一  
百五十萬兩陸續已到西安臣現按照則例明  
立章程務期撙節歸於實用其舊項報銷飛飭

軍需局及各承辦官員分造細冊逐款清查核  
實分別應銷應賠以杜浮冒奏入

上命軍機大臣傳諭松筠曰陝境奔竄賊匪惟張漢  
潮一股最爲狡譎可惡現在明亮慶成兩路新添  
兵力合之原有之兵爲數已及萬餘較前極爲壯  
盛明亮慶成惟當乘賊匪窮威西竄之時相機夾  
擊務擒張逆以洩衆憤至所稱富成原帶四川鄉

勇一千五百名河南鄉勇五百名現將老病者汰去一節此等汰去之勇作何歸結若聽其自便恐去而從賊或爲賊所戕害松筠亦當留心令有著落方安至精壯鄉勇一千八百名交王文雄帶領在西鄉堵禦此時王文雄一路兵力較單而此項鄉勇又未便遽行議撤自不得不如此辦理但鄉勇一項如在本省地方保其家口田廬自爲戰守

可期得力若隔省隨征究非入伍食糧者比未免  
各懷故土前此富成帶領時不能管束致有滋擾  
之事未必不由於此今以川豫之人在陝堵勦賊  
匪究竟能否出力松筠仍當留心查察將來此項  
鄉勇若令回籍安業想該勇等自所樂從而於軍  
營亦可期整肅再平利境內一股賊匪較爲猖獗  
大約係高均德張起貴由竹山奔回該處道員溫

承惠僅帶鄉勇二千名並無兵丁卽慶溥帶兵前往並不聲明兵數想亦不多此一路著松筠添撥兵丁以資勦辦之用若無可派之兵卽行具奏候朕酌奪其西鄉境內分竄一股又係何賊並著查明具奏至被賊衝散之義首張奎徐名揚吳大章三名如查明現尚存活卽酌加獎賞若被賊戕害皆咨部賜卹倘實無下落亦應量爲撫其家屬俾



急公之民知所勸勵此時松筠已至漢中陝省各  
路軍需均關緊要松筠惟當在彼分飭幹員妥爲  
運送以期各路源流接濟俾明亮等無匱乏之患  
並應加意核實以重軍儲此係專交松筠辦理之  
事無負委任也